

儀

顧

堂

集

儀顧堂集序

有明一代學術衰息不如唐宋遠甚及其季也
亭林先生崛起原本經術而發爲經世之學遂
卓然爲一大儒近世學者徒見其杜解補正諸
書爲阮文達采列 皇清經解之首遂奉亭林
爲我 朝治漢學之先河而不知此未足以盡
亭林也吾郡存齋陸君所學以朱子爲宗而又
深病世之稗販語錄掇拾大全者號爲宗朱而
適以叛朱因於 國初諸大儒中獨於亭林有
深契焉其言曰學也者上究今古興衰之故中

通宇宙利病之情下嚴身心義利之界在本
朝則亭林稼書是也又曰亭林之學一本朱子
而痛斥陽明其才足以撥亂而反正其行足以
廉頑而立懦至其教人以博我以文行已有恥
二句爲準尤足以持時局而正人心君所言如
是其所宗尚可知故以儀顧名其堂而卽以名
其集今讀其集議論純正根柢淵深信有如潘
次耕叙亭林先生書所謂綜貫百家上下千載
詳考得失斷之於心學博而識精理到而詞達
者至於一名一物考訂精詳亡篇逸句蒐輯無

漏則又亭林先生所以開漢學先河者也宜先生以儀顧名堂而卽以名集矣君之歿也余爲志其墓言君旣優於學又優於仕仕學兼優斯爲古之君子一時頗以爲知言越數歲而君之子純伯昆仲又以儀顧堂集求序余惟君往年曾蒙 天語褒嘉有著作甚多學問甚好之

論然則異時重開四庫館此集必在甄錄之列豈待余言爲重惟表君學術所從出使讀是集者相與講求經世之學勿使外人駕其異說反笑我經術之迂疏此則吾道之光亦世道之幸

也君此外所著書尚有九百二十餘卷備載墓
志茲不論云

光緒戊戌孟春德清俞樾

儀顧堂集目錄

卷一

儉解

原學

原捐

釋茶

釋杭

釋堇

釋胃

釋廬

五嶽辨

訊諍互譌辨

卷二

酒課攷

南宋浙江酒課攷

風俗通義篇目攷

淮南子高許二注攷

國朝文武互改攷

國朝薦舉得人攷

翎頂攷

補服攷

陸氏郡望攷

辮髮薙髮攷

肅府本閣帖非出淳化祖本攷

卷三

李廣論

張釋之不拜嗇夫論

招撫長興難民充兵議

籌復湖州議

擬復漢儒賈誼從祀議

擬顧炎武從祀議

擬毀湖州沈約祠議

卷四

上吳子苾閣學論
國朝古文書

上徐樹人方伯書

上倭艮峯相國書

復孫琴希觀察書

復施均甫觀察書

復姚彥侍方伯書

上李石農侍郎書

覆楊見山太守書

覆楊見山太守書

與宗湘文太守書

與繆筱山太史書

卷五

魏刺史文集序

說文引經攷序

陸清獻公爲宰錄序

二銘書屋碑目序

蒼筤館文集序

傳履堂集目錄
三
楊氏日記序

白雲山房詩藁序

重刊註陸宣公奏議序

重刊董氏道德經集解序

重刊師友雜志紫薇雜說序

重刊本草衍義序

重刊可書序

重刊乙巳占序

重刊宋本夷堅志甲乙丙丁四集序

重雕元稹傷寒百證歌發微論序

刻靖康要錄序

刻友會叢談序

卷六

重刻北戶錄序

刻自號錄序

重雕宋本通鑑釋文序

重刊石林奏議序

重刊明本排字九經直音序

刻續談助序

刻聖濟經序

重雕蘭雪堂本蔡中郎集序

重雕宋本衛生家寶產科備要序

刻續考古圖序

菱湖鎮志序

穰梨館過眼錄序

卷七

邱鈞磯詩集序

重雕北宋本爾雅疏序

儀顧堂續跋序

研經言序

楊秋室集序

重刻馮秋君遺藁序

送徐君青方伯入都序

送徐君青中丞巡撫江南序

送凌子與之上海序

贈憫之伯鉞序

夢隱圖序

廣督歷城毛公六十壽序

閩撫通州徐公七十壽序

卷八

重建韶州周元公祠堂記

重修安定書院記

楊氏義產記

寫經堂記

是山園記

重建鄒忠介公祠堂記

重修化州范龍學墓記

高文書院膏火記

南韶道題名碑記

高廉道題名碑記

松竹堂記

相江書院碑記

重興師堂渡記

上宮灣修路記

重建愛山臺記

歸雲庵名人墨蹟記

重濬碧浪湖記

卷九

誥授光祿大夫太子少保兵部尚書兼都察院右都御史湖廣總督吳文節公神道

碑銘

誥授通奉大夫貴州布政使沈公神道碑銘

誥授光祿大夫兵部尚書銜都察院右都御史原任兩廣總督厯城毛公神道碑銘
贈知府銜署廣東南雄直隸州知州孫君墓表

誥授資政大夫布政使銜署山東督糧道丁君墓表

刑部右侍郎浙江學政丹徒張公權厯志

社堂屈君墓誌銘

亡弟子壽權厝誌銘

韶兒壙誌銘

卷十

史堪傳

陳忠毅公別傳

徐莊愍公別傳

趙忠節公別傳

二忠傳

署紹興府知府廖君別傳

湖州府知府善君別傳

貴州糧儲道郎君別傳

徐主事別傳

蔣州判別傳

鈕主事別傳

聶隅先生傳

茅鈍叟先生別傳

凌少茗先生別傳

劉烈女別傳

節孝許氏傳

誥授朝議大夫禮部精膳司郎中鄭君家傳

同知潮州府事贈通議大夫徐君家傳
誥贈資政大夫章君家傳

卷十一

湖州府志人物傳政蹟

卷十二

湖州府志人物傳政蹟

卷十三

湖州府志人物傳文學

卷十四

湖州府志人物傳藝術

湖州府志人物傳寓賢

卷十五

徐幼青誄

候選知縣湘陰吳君誄

書蔡貞女事

書張念哉大令遺事

書鄭東里遺事

記卞小疋遺事

徐侯齋先生像贊

滕烈女贊

并序

記化州橘

記緬茄

記異

同年一首別楊利叔

祭徐中丞文

讀鬻子

讀申子

僞沈氏述祖德碑辨證

湖州府志凡例

卷十六

北宋蜀大字本春秋經傳集解跋

足本劉克詩說跋

元板詩集傳附錄纂疏跋

成化本周禮集說跋

元板音注全文春秋括例始末左傳句讀

直解跋

經典釋文跋一

經典釋文跋二

經典釋文跋三

經典釋文跋四

元板明本排字九經直音跋

宋本釋名跋

段氏說文注跋

續復古編跋

宋本古文四聲韻跋

影宋鈔切韻指掌圖跋

元刊切韻指掌圖跋

游明本史記跋

宋本漢書跋

宋本後漢書跋

元板新唐書跋

游大昇本宋史全文跋

許國公奏議跋

影宋鈔五代會要跋

校元板名臣事畧書後

嚴州圖經跋

莆陽比事跋

足本歲時廣記跋

卷十七

金刊清涼傳跋

宋板諸臣奏議跋

宋大詔令跋

原本北堂書鈔跋

宋本太平御覽跋

宋本百川學海跋

小兒方論跋

醫學真經跋

元板晞范句解八十一難經跋

金匱衍義跋

傷寒紀元妙用集書後

明鈔皇鑑箋要跋

書楊升庵刻廣川畫跋後

舊鈔三山志跋

釣磯集跋

影宋明州本騎省集跋

晏元獻遺文跋

春卿遺藁跋

錢唐集跋

歐陽文忠集跋

卷十八

柯山集跋

宋景文集跋

臨川集跋

毘陵集跋

浮溪集跋

汪文定集跋

野處類藁書後

後村大全集跋

陳石堂集跋

卷十九

釣磯詩集跋

元板秋澗集跋

丹崖集跋

二妙集跋

野古集跋

挈經室外集書後

養新錄書後

宋板文選跋

足本草堂雅集書後

景泰本河汾諸老詩集跋

元本洞霄詩集跋

宋板雞峯普濟方跋

普濟本事方跋一

普濟本事方跋二

金刊張子和醫書跋

卷二十

北宋本冊府元龜跋

宋板金壺記跋

宋本重修事物記原跋

宋板自警編跋

宋板揮麈錄跋

宋板愧郈錄跋

北宋本李太白文集跋

北宋本小畜外集跋

宋板范文正集跋

宋本王注蘇詩跋

宋本呂東萊集跋

宋本黃勉齋集跋

宋板崇古文訣跋

鮑刻遂昌雜錄跋

周文矩重屏圖卷跋

隔鞞論書後一

隔鞞論書後二

儀顧堂集卷一

歸安陸心源撰

儉解

孟子曰恭者不侮人儉者不奪人又曰自古賢君必恭儉禮下取於民有制然則儉者不奪人之謂也數十年來士大夫習於奢侈有一二敝衣履甘蔬菜者則羣然許之曰儉退而考其生平則嗜利如恐不及是則古之人以不奪人言儉今之人以奪人不與人言儉也嗚呼奪人以與人固不得謂儉奪人不與人不與人反得謂之儉

哉作儉解

原學

學也者學爲君學爲臣學爲父子兄弟夫婦朋友者也三代而下有小人之學有異端之學有小儒之學有大人之學約縱連橫之說也堅白同異之辨也詞賦之類於俳優也佔畢之誣罔聖賢也內不足以治其身外不能以益於人苟以趨時好悅人主竊顯官惑愚衆此荀子所謂以學爲禽犢也皆小人之學也黃老之清靜楊氏之爲我墨氏之兼愛申韓之刑名釋氏之慈

悲用其說亦足以立國原其心亦主以救偏而濟人然而畸於先王之教悖於聖入之道皆異端之學也研訓詁通假借證名物析異同但道伏鄭是甯言孔聖非是爲攷證之學文必飾詞必修皮傅孔孟祖述韓歐詡詡然矜爲因文見道者是爲文章之學徐言而緩步儒冠而縫衣析性命之精微辨朱陸之同異囿於一先生之學不博攷於聖人之通者是爲性命之學是數者幾於道矣然而考之於古而宜推之於今而未必宜著之於言而然稽之於行而未必然修

之一身而優措之天下而未必優皆小儒之學也若夫大人之學則何如學也者學爲君學爲臣學爲父子夫婦兄弟朋友者也上究今古興衰之故中通宇宙利病之情下嚴身心義利之界若漢之賈生董生孔明唐之陸敬輿李鄴侯宋之范希文濂溪明道橫渠考亭止齋東萊元之靜修

本朝之亭林稼書是也夫是之謂大儒之學
原捐

捐之說何昉乎三代以上謂之貢謂之助謂之

徹謂之征又謂之稅三代以下謂之權謂之算
謂之括謂之除陌錢謂之經總制頭子錢至於
本朝謂之捐周禮廛人掌斂其廛市杜子春注
謂邸店之稅漢之算緡二千算錢百二十唐之
除陌錢緡留五十宋之經總制錢緡取錢百今
之釐捐是也唐德宗稅間架今之房捐是也漢
武元狩四年四民有輶車船長五丈以上皆有
算今之船捐是也宋元嘉廿七年富民家貲滿
五十萬僧尼滿二十萬四分借一唐德宗時括
富商錢四分借一今之戶捐是也漢武元光六

年令民得買爵至千夫者得先除爲吏今之捐納是也蓋古者什分取一而力役則用民田獵則用民兵戎則用民至車馬牛楨榦芻糧器械皆民供之而官不與故無事不能少取有事亦不必多取

本朝取民之制自什一至於三十取一有差取之已少於古矣然力役則出雇而民不與田獵則出帑而民不與甚至車馬牛楨榦芻糧器械一切軍營需用之具皆官給之而民不與故當其無事民享其利而不覺及乎有事不能不取

辦於民勢也是故役民之所當應也不用其力而使之捐是財以代力也兵民之所應出也不驅之戰而使之捐是以財代兵也蓋酌時勢順人情收實效而不可易者也或者謂捐乃後世之所爲豈可比之三代之法不知論其名則賦爲良法捐爲敝法論其實捐固取民賦亦非助民也古之王者豈忍奪民以自便哉顧不取於民則國無以立夫捐亦若是而已矣如必循儒生之說而不度時務之宜則堯鹽算舟乃漢之稗政今將裁運使而廢料關可乎井田封建乃

古之成法今將裂土地而奪民田可乎是速之
叛而益之危也未已也如謂多取爲虐少取爲
仁則漢法三十取一至文帝而竝免之矣將謂
文帝賢於湯武乎有若之告哀公也盍徹而已
而晁錯則竝請免之將謂晁錯賢於有若乎必
不然矣吾怪夫後之儒者敢於議後王而怯於
求古制篤於信目論而疏於考通方以致議論
益高而時事益棘也作原捐

釋茶

茶非一物也有苦菜之茶有茗薺之茶有茅秀

之茶有萑芳之茶論者混而莫辨豈多識之謂
哉詩采茶薪樗誰謂荼苦堇荼如飴甯爲荼毒
以殍荼蓼爾疋荼苦菜樊光注苦菜可食者也
說文荼苦菜也本草苦菜名茶草一名選別錄
一名游冬生山陵道旁冬不死顏氏家訓書證
篇葉如苦苣而細摘斷有白汁花如菊李時珍
曰俗呼老鸛菜此苦菜之茶也爾疋櫃苦茶郭
注樹小如梔子冬生葉可煮作羹飲今呼早采
者爲茶晚取者爲茗一名薺蜀人名之苦茶王
褒僮約陽羨買茶蜀志韋曜傳曜初見禮異或

密賜茶芽以當酒茗博物志飲真茶令人不眠
此茗芽之茶也詩有女如荼地官掌荼掌以時
聚荼考工記鮑人望而眡之欲其荼白也旣夕
禮茵著用荼夏小正四月取荼荼也者以爲君
薦蔣也爾雅藁荼荼國語望之如荼漢書禮樂
志顏如荼兆逐靡此茅秀之荼也詩予手捋荼
夏小正七月灌荼荼荏葦之秀者也荆楚歲時
記犍爲舍人曰杏花如荼可耕白沙此荏芳之
荼也自陸羽改檟苦荼之荼爲茶而說者又混
荏芳茅秀爲一甚者以荼苦菜之荼說夏小正

取茶之茶豈不謬哉

釋杭

杭魚毒之名著於爾疋釋木字或作荒

文釋

而古

今說者紛紛不一郭璞注杭大木子似栗生南方皮厚汁赤中藏卵果鄭樵注云今南人謂之杭木其皮可煎汁藏梅劉逵吳都賦注引異物志云杭大樹也其皮厚味近苦澀剝乾之正赤煎訖以藏衆果使不爛敗以增其味豫章有之廣韻注杭木名出豫章煎汁藏卵果不壞沈瑩臨海異物志杭味如楮用其皮汁和鹽漬鴨子

裴淵廣州記杭殼似栗赤色子大如栗散有棘
刺破其外皮肉白如脂肪著核不離賈總齊民
要術作杭子法云杭木皮淨洗細莖剉煮取汁
率二斗及熟下鹽一升和之汁極冷內甕中浸
鴨子一月煮而食之錢易南部新書云湖州歲
貢黃杭子連蒂木瓜左文質吳興統記云大厯
元年進單黃杭子談鑰吳興志云唐歲貢單杭
子一千三百五十顆重黃杭子一千三百顆樂
史寰宇記湖州土產單杭子此皆以杭爲大木
而用其子者也墨子禰守篇種畜芫芸烏喙中

山經首山草多荒芸注云芫花中藥說文解字

曰芫魚毒也本草經曰芫花殺蟲日華子曰芫

花小樹在陂澗旁

證類本草

圖經曰芫華宿根舊枝

莖長一尺

證類本草

吳氏本草曰芫華根有毒可用

殺魚

御覽藥部九引

顏籀急就篇注云芫華一名魚毒

漁者煮之以投水中魚則死而浮出故以爲名

其根曰蜀桑其華可以爲藥芫字或作杭爾疋

曰杭魚毒郭景純解云大木生南方皮厚汁赤

堪藏卵果此說誤耳生南方用藏卵果者別自

一木乃左思吳都賦所云縣杭枕櫨耳非毒魚

之杭也本草別錄芄華一名毒魚一名杜杭其
根名蜀桑可用毒魚郝氏懿行爾雅義疏曰卽
今芄條苗高二三尺其華紫色葉如柳葉而小
擣其汁以毒魚則死此皆以芄爲草類而用在
華者也愚案顏氏之說是也蓋芃本草類故字
作芃而宿根舊枝形如小樹故爾雅與枸杞同
入釋木後人以芃在釋木改从木作杭說文無
杭字蓋俗作也郭注望文生義遂以南方大木
當之慎矣

釋莖

莖草類也而其別有三莖菜一也蒟蒻二也烏
頭三也爾疋齧苦莖注今莖葵也葉如柳子如
米汭食之滑說文莖草也根如薺葉如細柳蒸
食之甘詩莖茶如飴夏小正三月榮莖莖菜也
公食大夫禮鉏耒有滑鄭注莖莖之屬內則莖
苴粉榆兔薺滌瀧以滑之三十國春秋劉殷曾
祖母王氏盛冬思莖殷入澤中慟有莖生焉得
斛餘後魏書崔利爲昌平太守性鄙恠其母季
春思莖惜錢不買爾疋翼本草唐注莖菜野生非
人所種葉如薺花紫色此莖菜之莖也爾疋菹

莖草說文芟莖草也藿莖草也廣雅莖藿也陸

德明曰莖藿也今三輔之言猶然詩縣釋文又曰本

草蒴藿一名莖草一名芟非烏頭也爾疋此莖釋文

草之莖也國語晉語置莖於肉賈逵注烏頭也

淮南子說林訓蝮蛇螫人傳以和莖則愈物固

有重爲害反爲利此烏頭之莖也蓋烏頭名莖

不名芟芟名莖又名蒴藿而非烏頭莖菜又名

藿三者判然自郭氏注爾疋以芟爲烏頭而廣

韻遂以芟爲烏頭別名所謂重性施繆者矣

釋旨

說文肩小蟲也爾疋釋蟲蝟蝟注井中小結蝟
赤蟲考工記注讀若井中蟲蝟之蝟莊子秋水
篇釋文𧈧井中蟲也一名蝟廣疋子子蝟也淮
南子說林訓子子爲蝟注子子結蝟水上倒跂
蟲通俗文蝟爲蚊音義一切經爾疋翼謂之釘倒蟲
蓋卽今之𧈧𧈧蟲也其形如蚊而竊黑行則顛
倒而下止則尾浮水上頭懸在下故高誘謂之
倒跂羅願謂之釘倒老則生羽及足遺蛻於水
故淮南王服子慎皆以爲蝟亦有赤色者故郭
景純陸德明又以爲赤蟲此蟲多生於止水不

生於流水故鄭司農郭景純陸德明皆以爲井中蟲虯與蠅同子子結蠅卽冒之聲轉弔弔又到跂之語轉也或謂之幡跟頭蟲亦以其形名之耳

釋塵

說文塵蟲也秋官赤友氏注狸蟲塵肌蛛之屬本草一名地鼈別錄一名土鼈蓋卽今南人所謂灰鼈蟲北人所謂過蚤娘也其形圓扁如鼈大者徑寸餘背文橫而色竊黑好穴牆根灰土中周官以爲狸蟲者狸者鼃也言其鼃於土中

也廣疋廡負蟠則與鼠婦合爲一物夫鼠婦形長廡形圓雖同穴牆壁之下判然二物不可混也玉篇曰廡鼠婦負蟠又沿廣疋而誤矣

五嶽辨

爾雅釋山河南華河西嶽河東岱河北恆河南衡又曰泰山爲東嶽華山爲西嶽霍山爲南嶽恆山爲北嶽嵩高爲中嶽據前說則有吳嶽而無嵩高有衡山而無霍山據後說則反是周禮大司樂鄭注曰五岳岱在兗州衡在荊州華在豫州嶽在雍州恆在并州詩疏引孫炎曰霍山

當作衡山此以前說爲正也說文嶽東岱南霍
西華北恆中泰室白虎通義曰嶽者何謂也嶽
之爲言嶽也嶽功德也東方爲岱宗者何言萬
物更相代於東方也南方爲霍者何霍之爲言
獲也言大陽用事護養萬物也西方爲華山者
何華之爲言獲也言萬物成熟可得獲也北方
爲恆山者何恆者常也萬物伏藏於北方有常
也中央爲嵩高者何嵩言其高大也應劭風俗
通伏生大傳張揖廣雅皆同此以後說爲正者
也毛詩嵩高傳曰東嶽岱南嶽衡西嶽華北嶽

恆史記封禪書述尚書四嶽而釋之曰岱宗泰山也南嶽衡山也西嶽華山也北嶽恆山也中嶽嵩高也鄭注周禮大宗伯孝經鉤命決王肅注尚書伏虔注左傳皆同此以岱恆華衡嵩高爲五嶽與爾雅前後二說皆不同者也風俗通曰南方衡山一名霍郭璞爾雅注云霍山今在廬江灊縣西南別名天柱山漢武帝以衡山遼曠移其神於此今其土俗人皆呼之爲南岳南岳本以兩山爲名非從近也學者多以霍山不得爲南岳又言從漢武帝始乃名之如此言則

爲武帝在爾雅前乎斯不然矣此以衡山霍山
爲一山調停爾雅之說者也案五嶽當以後說
爲正與封禪書詩毛傳周禮注鉤命決王肅伏
虔所言皆合其曰霍山者邵氏二雲所謂漢儒
所竄易也孫叔然云霍當爲衡其說最精至所
云河南華河西嶽河東岱河北恆江南衡者言
山非言嶽也鄭氏據之以注大司樂之五嶽誤
矣三禮義宗云唐虞以衡山爲南岳周氏以霍
山爲南岳水經注霍山爲南岳在廬江灊縣西
南衡山在長沙湘南縣南皆以衡霍爲二山則

風俗通所云衡山一名霍郭氏所云南岳本自以兩山得名其說皆非至郭氏言漢武帝移衡山神於霍山又述學者以漢武帝始名霍山爲南岳與封禪書所言漢武巡南郡至江陵而東登禮瀟之天柱山號曰南岳合此以霍山爲南岳爲出漢武後之明證而郭氏乃以武帝非在爾雅前爲言夫爾雅固在漢武前而郭氏所見之爾雅非必漢武以前之本也斯不然矣要之岱華恆衡嵩古今相傳之五嶽也岱華恆霍嵩漢武所改之五嶽也邵二雲爾雅正義退嵩高

而進吳嶽郝蘭皋爾雅義疏以爲衡山一名霍山依違應劭之說其說皆非

訊諱互譌辨

說文訊問也从言孔聲諱讓也从言卒聲而訊諱二字多有相混者考孔聲卒聲古音絕遠惟形則相似蓋形之譌非聲之通也博稽傳記此類甚多有義當爲諱而字譌作訊者有義當作訊而字譌作諱者詩陳風歌以訊止與萃爲韻釋文云本又作諱訊予不顧楚辭九歎注作諱予不顧小疋雨無正莫肯用訊與退遂爲韻爾

疋諄告也釋文本又作諄吳語乃訊申胥韋注
訊告讓也說文引作諄申胥又訊讓曰至注訊
告也史記賈生弔屈原賦訊曰漢書作諄李奇
曰告也又本傳立而諄語張晏曰諄責讓也賈
子時變篇作訊漢書敘傳幽通賦旣諄爾以吉
象兮今文選諄作訊後漢書張衡傳思元賦占
水火而妄諄文選諄作訊與內對爲韻左思魏
都賦翩翩黃鳥銜書來訊與匱粹溢出秩器室
莅爲韻此當義爲諄而或譌作訊者也學記多
其訊言注訊猶問也釋文字又作諄莊子山木

篇虞入遂而諄之郭象注曰諄問之也釋文本
又作訊徐無鬼篇察士無凌諄之事釋文引廣
疋諄問也楚辭九歎訊九魁與六神注訊問也
一本作諄此義當爲訊而或譌作諄者也蓋猶
資譌爲貳而後人遂有音二者筮譌爲莖而後
人遂有音經者不知資不可通作貳筮不可通
作莖也王氏引之曰訊古亦讀若諄訊諄同聲
故二字互通其說非也

儀顧堂集卷一終

儀顧堂集卷二

歸安陸心源譔

酒課考

武帝天漢三年初作酒權

唐德宗貞元二年每斗權錢百五十

按杜詩速宜相就飲一斗恰有三百青銅
錢今權百五十則十分抽五矣

宋至道二年兩京諸州收權課銅錢一百二十
一萬四千餘貫鐵錢一百五十六萬五千餘貫
京城賣麵錢四十八萬餘貫

天禧末權課增銅錢七百七十九萬六千餘貫
鐵錢增一百三十五萬四千餘貫賣麵增三十
九萬一千餘貫

按會要鐵錢十當銅錢一

慶厯二年閏九月二十四日初收增添鹽酒課
利錢每升添一文謂之王福部一文添酒錢
皇祐中歲課合緡錢一千四百九十八萬六千
九十六貫

熙甯五年正月四日令官務每升添一文

崇甯二年十月八日令官監酒務上色升添二

文中下一文

四年十月量添二色酒價錢上色升五文次三文

政和五年十二月十一日令諸路依山東酒價升添二文

建炎四年十一月十二日曾紆申請權添酒錢每升上色四十二文次色十八文

紹興元年令添酒錢每升上色二十文下色十文

三年四月八日令煮酒量添三十文作一百五

傳風堂集卷二
十文足

按自慶厯至紹興共增一百一文而曰作一百五十文足則舊課當得五十文矣

五年閏二月每升各增五文

六年二月權增升十文

八年六月令兩浙諸路煮酒增添十文足并臘蒸酒增添六文足

九年以都督府申請權添十一文

又有發運使造缸添酒錢每升上色三文次二文提舉司量添酒錢又以上下色升一文不知

所始

按酒之有課尚矣而獲利之厚無過於宋南渡後四川一省歲收至六百餘萬貫故能以江南半壁支持強敵馬騰士飽延百餘年其生財之道善矣蓋酒爲嗜好之物而非日用所需不飲者雖強之而不能嗜飲者卽禁之而不止故雖加價十倍亦不致有累於民較之加賦於田抽錢於丁相去不亦遠哉

南宋浙江酒課考

杭今杭州府十務三十萬貫以上

越今紹興府十務

湖今湖州府六務

秀今嘉興府七務

婺今金華府十務十萬貫以上

明今甯波府五務

溫今温州府七務

台今台州府八務

衢今衢州府四務

睦今嚴州府七務五萬貫以上

處今處州府八務三萬貫以上

此宋史食貨志所記慶厯以前未增酒課之所入也其時每斗課錢不過五十文而所入已如此則南宋時增至百五十文每歲當得三百萬矣考文獻通考記南宋浙江戶口四百餘萬我

朝承平二百餘年滋生日衆視南宋約增一倍而贏此千萬人中飲酒者當得十之二以每人日飲一斤計之每日可售酒二百萬斤每斤加錢五文每日可得錢一萬貫一

年即可得三百六十萬貫地不改闢也民
不改聚也苟能參古今之宜得廉幹之入
而經理之其於國計豈但小補而已哉

風俗通義篇目攷

風俗通義隋書經籍志三十一卷注云錄一卷
唐書藝文志三十卷與隋志異蓋隋志并錄計
之唐志不并錄計之也至宋已無完書是以崇
文總目所載惟十卷元豐中蘇魏公以官私兩
本互校次爲十卷卽今所行本也見魏公集
後郡齋讀書志書錄解題文獻通考所載無過卷六十六嗣

十卷者但風俗通原本雖佚而庾仲容子鈔馬
總意林宋時尚有完書所錄皆見三十卷本此
見於廣韻御覽通志者所以多出今本外也嘉
定錢曉徵始有逸文之輯仁和孫貽穀繼之盧
昭弓又加考訂刊入羣書拾補中於應氏書逸
文搜羅略備矣惟原書三十卷篇各有名今自
十篇之外書亡而篇名亦亡雖以錢孫盧三君
之博洽僅據太平御覽續漢書五行志考得論
數災異兩篇名其他未能詳也愚以蘇魏公集
校正風俗通義序攷之皇霸正失誓禮過譽十

反聲音記典神怪山澤十篇之外其餘篇名之
見於意林者曰心政曰古制曰陰教曰辨惑曰
析當曰恕度曰嘉號曰穢稱曰恃遇曰姓氏曰
諱篇曰釋忘曰輯事曰服妖曰喪祭曰宮室曰
市井曰數紀曰新秦曰獄法凡二十目合之今
存十篇適當三十篇與唐書藝文志合御覽所
引論數當卽數紀篇盧氏據續漢五行志增災
異一目恐未必然也敎又引意林所載析當篇
云泰山太守臣劭再拜上書曰秦皇焚書坑儒
六藝缺亡高祖受命四海又安往於壁柱石室

之中得其遺文竹朽帛裂殘缺不備至國家行
事俗間流語莫能原察故三代遺輜軒使者經
絕域採方言令人君不出戶牖而知異俗之語
耳凡九十字爲羣書拾補所遺故竝錄之

淮南子高許二注攷

隋書經籍志淮南子二十一篇許慎注又高誘
注二十一卷新唐書藝文志同至宋而高許二
注相混故陳氏書錄解題謂今本題許慎注而
詳序文卽是高誘殊不可曉嘉慶中莊逵吉重
刊淮南子敘始謂後人誤合兩家爲一混而不

分似矣至據地形訓大汾注與呂覽注異倣真
訓劓劓注與本經訓注異以證之則未知古人
注書先後互異者甚多未可以爲證也以愚攷
之高注十三篇自漢迄今無異許注二十一篇
至北宋時存十八篇今惟存八篇何以明之高
氏自序云并揖借八篇刺之會揖身喪遂亡不
得是誘在時已亡八篇矣隋唐之後何以反得
廿一篇乎此高注原本有十三篇無二十一篇
之明證也蘇魏公校正淮南子序云是書有後
漢太尉祭酒許慎東郡濮陽令高誘二家之注

隋唐目錄本別傳行今校崇文舊書與蜀川印
本暨臣某家書凡七部竝題曰淮南子二注相
參不復可辨惟集賢本前賢題云許標其首皆
是問詁鴻烈之下謂之記上高題卷首皆謂之
鴻烈解經解經之下高氏注每篇之下皆曰訓
又多數篇爲上下以此爲異崇文總目亦如此
云又謂高注更詳於許氏本書文句亦有小異
臣某據文推次頗見端緒高注篇名皆有故曰
因以題篇之語其間奇字竝載音讀許於篇下
粗論大意卷內或有假借用字以周爲舟以楫

爲循以而爲如以恬爲惔如此非一又其詳略不同誠如總目之說互相考證去其重複共得高注十三篇許注十八篇此北宋時許注存十八篇之明證也余初讀淮南子頗怪原道俶真天文墜形時則覽冥精神本經主術汜論說山說林修務十三篇注何以詳且有句讀其餘八篇注何以略且無音讀截然如出兩手及讀蘇魏公集且細繹高氏序而千載之疑乃釋案原道俶真天文墜形時則覽冥精神本經主術汜論說山說林修務十三篇每篇名注皆有因以

題篇四字注中載音讀如滑讀曰骨哥讀曰謳
歌之類甚夥則此十三篇乃高注也謬稱齊俗
道應詮言兵略人間泰族要略八篇篇下無因
以題篇四字注皆粗解大意且無音讀則此八
篇乃許注也想魏晉以後因高書不全遂以許
書補之猶范曄書無志以司馬彪補之也故隋
唐志皆云二十一卷許注略於高注後人喜詳
輕略高書行而許書遂微宋時尚存十八篇至
明而十八篇亦不可見矣獨怪孫氏星衍錢氏
坫程氏敦莊氏達吉於淮南書用功頗深但知

二注之混而不知其混而實分則矜言漢學讀書不多之弊也後有校正淮南子者於謬稱八篇宜題曰許慎記上於原道等十三篇宜題曰高誘注斯乃高許之功臣矣

國朝文武互改考

國朝武臣之改文者邵陽魏氏聖武記曾及之矣然猶未盡也因復爲表而出之岳威信公鍾琪成都人康熙五十年捐納同知改武職奉旨以四川遊擊用石禮哈漢軍正白旗人由直隸正定同知捐陞道員改授正定協副將遷總

兵署貴州巡撫劉總戎清貴州拔貢歷官山東
鹽運使請改武職特

旨授山東登萊鎮總兵此文改武者也趙襄壯
良棟甘肅甯夏人由守備至甯夏提督康熙十
九年擢雲貴總督子敏恪宏燦由廕生擢甯夏
總兵康熙四十五年擢兩廣總督五十五年授
兵部尚書楊總督鯤山西甯武人由廕守備至
古北口提督雍正七年署直隸總督緣事革職
梁總督鼎陝西長安人由遊擊累官福建提督
康熙四十五年擢浙閩總督韓良輔陝西甘州

人康熙三十年武探花累官廣西提督旋署廣西巡撫雍正五年實授緣事革職宋尚書犖商邱人由侍衛改授通判官至吏部尚書岳襄勤鍾琪累官四川提督甘肅巡撫川陝總督終於四川提督馬尚書會伯甘肅甯夏人康熙三十九年武狀元累官貴州甘肅提督雍正四年授四川巡撫擢兵部尚書緣事革職劉將軍世明河內人雍正中由湖南提督授福建巡撫擢總督授副將軍赴巴里坤革職旋署甘州總督以縱兵掠刼伏法楊忠武遇春四川崇慶州人由

武舉累官固原提督擢陝甘總督此武改文者也他若武臣之得公孤加銜文臣之列土分茅此固

國家酬庸從厚諸臣文武兼資又不可一概論也

國朝薦舉得人考

我朝薦舉之目有四曰博學宏詞曰經明行修曰孝廉方正曰山林隱逸康熙乾隆兩開鴻博之科得人最盛其應經明行修之薦者若顧震滄陳亦韓諸先生皆不愧爲醇儒嚴方伯如煜

由孝廉方正起家川楚教匪之滅多用其策惟山林隱逸一科薦而不出者果有其人其出者蓋少表見焉若於四科之外以人才特薦爲國柱石名垂不朽者吾得三人焉曰傅忠毅宏烈曰吳恭定紹詩曰方敏恪觀承忠毅江西進賢人順治十四年廣西總督王國光疏薦授廣東韶州同知官至廣西巡撫拜撫蠻滅寇大將軍殉吳逆之難恭定山東海豐人雍正元年由生員保舉分刑部學習累官刑禮二部尚書敏恪桐城人雍正十一年由監生薦授中書厯官直

隸總督是三公者忠毅以忠烈恭定敏恪以政
事其所表見未可一概論也信乎國家立賢無
方所貴人能自立耳

翎頂攷

翎頂我

朝定制也而不知前明已爲之兆敬案會典貝
子固倫額駙戴三眼孔雀翎鎮國公輔國公和
碩額駙雙眼孔雀翎此爵翎也其職任之戴翎
者領侍衛內大臣侍衛鑾儀衛滿州鑾儀使冠
軍使雲麾使治儀正整儀衛前鋒營護軍營火

器營園明園護軍營健銳營官十五善射善騎射善射鵠人宗室覺羅獻爵官護衛將軍提督陵寢總管提督銜之巡撫派往西北兩路換班大臣五品以上花翎六品以下藍翎去任則除品官若軍功若射布帔得賞花藍翎者非降革越品則不除品官功高者亦得特賞雙眼孔雀翎此

本朝翎支之定制也又會典親王郡王貝勒貝子頂用紅寶石固倫額駙和碩額駙不入八分鎮國公輔國公民公侯伯子鎮國將軍郡主額

駙文武一品朝頂用紅寶石吉服冠頂用素珊瑚奉國將軍郡君額駙文武二品官頂用縷花珊瑚奉國將軍郡君額駙文武三品官頂用藍寶石奉恩將軍縣君額駙文武四品官頂用青金石文武五品官頂用水晶六品頂用車渠七品及進士用素金八品及舉貢用縷花陰文金頂九品及未入流用縷花陽文金頂監生生員用素銀頂此

本朝冠頂之制也竊攷明史輿服志正德十一年設東西兩廳官都督江彬等承日紅笠之上

綴以靛染天鵞翎以爲貴飾貴者飄三英次者兩英兵部尚書王瓊得賜一英冠以下教場自謂殊遇案靛染天鵞翎卽今之藍翎此乃翎支之肇端又輿服志文武官常服洪武六年定凡職官一品二品帽頂帽珠用珠玉三品至五品帽頂用金帽珠除玉外隨所用六品至九品帽頂用銀帽珠用瑪瑙水晶香木此卽頂珠之肇端敬案會典事例頂翎之制始於崇德元年我朝創制顯庸原非襲前明之舊而天與人歸明人已先爲之兆矣

補服考

補服明制也

本朝因之而微有更定考明史輿服志文武官
常服洪武二十四年定公侯駙馬伯服繡麒麟
白澤文官一品仙鶴二品錦雞三品孔雀四品
雲雁五品白鵬六品鷺七品鷓鴣八品黃鸝九
品鶴鶉雜職練雀風憲官獬豸武官一品二品
獅子三四品虎豹五品熊羆六品彪八品犀
牛九品海馬恭讀

大清會典事例順治九年題准親王補服用五

爪團龍文四郡王同貝勒貝子固倫額駙用四
爪團龍文二鎮國公輔國公用四爪方蟒公侯
伯或用麒麟或用方蟒文官一品仙鶴二品錦
雞三品孔雀四品雲雁五品白鸚六品鷺鷥七
品鸕鶿八品鵪鶉九品練雀武官一二品獅子
三品虎四品豹五品熊六七品彪八品犀牛九
品海馬都察院按察使官不論官級皆用獬豸
康熙元年題准公侯伯用四爪方蟒武一品麒
麟三年題准武三品用豹四品用虎雍正六年
覆都察院都事經歷筆帖式按察使經歷等官

均用本身品級不得用獬豸又案

皇朝禮器圖式親王補服前後正龍兩肩行龍
郡王前後皆行龍貝勒四爪正蟒貝子固倫額
駙四爪行蟒鎮國輔國公和碩額駙四爪正蟒
方補愚案漢以前羣臣朝祭之服皆以九章七
章五章爲別其常服大抵以裳之元素黃雜爲
別唐宋祭服仍古制朝服概用絳紗而以佩綬
爲別其常服之別三品以上紫五品以上朱七
品以上綠九品以上青明制朝祭之服參酌唐
宋舊制常服以繡補爲別則自太祖始也但明

人施之於袍我

朝用之於褂爲小異耳

陸氏郡望攷

陸氏有吳郡河南二望吳郡之陸唐宰相世系表以爲出於齊田完之後齊宣王少子通封於平原般縣陸鄉卽陸終故地因以氏焉是也陸賈始見於史記漢立會稽郡續以會稽著後分會稽爲吳郡續以下以吳郡著唐立蘇州德明以下以蘇州著惟宣公族孫展分居陝州五代分裂散處他方然宋以後名列史傳者南方之

陸居多後漢書陸續傳曰世爲族姓三國志陸遜傳曰世江東大姓則吳中陸氏門第之高子姓之蕃不始於六朝矣河南之陸出於鮮卑步六孤氏通志氏族略孝文改爲陸氏是也陸真始見於魏書至隋而爽以臨漳著至唐而堅以河南洛陽著古今姓氏書辨證唐代定河南陸氏舊在乙門蓋唐世宰相六人皆望吳郡而河南陸氏無一人其盛衰固不侔也今江東之陸多祖續續遜瑁而郡望皆署河南無署吳郡者非數典而忘其祖乎推原其故皆沿鄉塾百家

姓之譌余故攷唐以前諸史凡陸氏之見於史者備舉里貫世系著於篇一以見先世人才之盛一以明兩宗郡望之殊庶後之人不致承譌踵謬焉

史記陸賈傳 楚人

後漢書陸康傳 吳郡吳人 祖父續 父褒

子儁 少子續

後漢書獨行傳陸續會稽吳人世爲族姓 祖

父閔 長子稠 中子逢 少子褒 褒子康

三國志吳志陸續傳 吳人也 父康 長子

宏 次子叡

陸瑁傳 遜弟 子喜 注 孫睦 玩

陸遜傳 吳郡吳人世江東大族 從祖康

長子延 次子抗 抗子 晏 立 機 雲

陸凱傳 吳郡吳人 遜族弟 弟允 允從

兄禕

晉書陸機傳 吳郡吳人 祖父遜 父抗

子蔚 夏 弟雲 耽 從父兄喜 喜子育

陸睦傳 吳郡吳人 伯父喜 父英 弟玩

玩子納 納無子以弟子道隆嗣

宋書張茂度傳陸仲元吳郡人 玩曾孫 弟

子真

宋書良吏陸徽傳 吳郡吳人 子睿 弟展

宋書良吏王歆之傳 陸法真吳郡人

南齊書陸澄傳 吳郡吳人 祖邵 父瑗

弟鮮

南齊書陸慧曉傳 吳郡吳人 祖萬載 父

子真 子倕

南齊書文學傳陸厥吳郡吳人 父閑

南齊書孝義傳陸絳 閑子

梁書陸杲傳

吳郡吳人

祖徽

父睿

弟

煦 子罩

梁書陸倕傳

吳郡吳人

玩七世孫

祖子

真 父慧曉

第四子纘

陸襄傳

吳郡吳人

父閑

陸黯傳

海鹽人

陸雲公傳

吳郡人

祖閑

父完

從兄才

子

陳書陸山才傳

吳郡吳人

祖慧曉

子辨

惠 兄子見賢

陸瓊傳 吳郡吳人 祖完 父雲公 子從
宜 從典

儒林傳陸詡吳人

文學傳陸琰瓊從父弟 父令公 弟瑜 瑜

從兄玠玠晏之子 從弟琛琛邱公之子

南史儒林傳陸慶吳郡人 宗人榮

南史恩倖傳陸驗吳郡吳人

魏書陸真傳 代人 父洛侯 子延

魏書陸侯傳 代人 曾祖幹 祖引 父突

子馘 馘弟石跋 石跋弟歸 歸弟尼

昆弟麗 馱第五子琇 琇弟凱 凱長子暉

暉子元規 暉弟恭之 恭之子暉 暉弟

寬 歸子珍 珍子旭 旭子騰 騰弟融

麗長子定國 定國子昕之 昕之無子以從

兄希道子子彰嗣 麗次子叡 叡長子希道

次子希質 麗弟龍成 龍成子昶 麗季

弟麒麟 俟族子儁

北齊書陸印傳 子彰子 子乂 印弟駿

駿弟元卿

周書陸騰傳 俟元孫 父旭 子元 融

陸通傳 吳郡人 曾祖載從宋高祖平關中
師還遂沒赫連氏 父政 通弟逞 逞子操
隋書陸爽傳 魏郡臨漳人 祖順宗 父概
之

按北史爽侯之元孫麒麟之曾孫

陸知命傳 吳郡富春人

隋書孝義傳陸彥師 魏郡臨漳人 祖希道

父子彰

唐書陸元方傳 蘇州吳人 陳給事黃門琛

之孫 伯父柬之 子象先 景倩 景融

景融四世孫希聲 元方從父餘慶 餘慶子

璟 孫長源

陸贄傳 蘇州嘉興人

陸亘傳 蘇州吳人

陸質傳 吳人七世祖澄梁名儒

陸展傳 贄族孫客於陝遂爲陝人

孝友傳陸南金 蘇州吳人 祖士季 弟趙

璧

隱逸傳陸龜蒙 元方七世孫

儒學傳陸德明 蘇州吳人 子敦信

儒學傳陸堅 河南洛陽人

文藝傳陸據 河南人 後周上庸公騰六世孫

按河南之陸爲侯之後唐書具在確有明徵通雖賜姓步六孤氏史不稱步六孤周亡當復姓由是言之北方之陸尚有望吳郡者況吳中陸氏乎

辮髮薙髮攷

辮髮薙髮人皆謂始於

本朝而不知金代已然請列四證以明之李心

傳建炎以來繫年要錄卷二十八建炎三年金
元帥府禁民漢服又下令髡髮不如式者弑之
青州觀察使李邈故爲真定帥城陷入金留金
三年金欲以邈知滄州笑不答及髡髮令下邈
憤詆之金人以撾擊其口流血後吮血喫之翌
日自祝髮爲浮屠金人大怒命擊殺之此一證
也保義郎李丹者被拘髡其首憤懣一夕死此
二證也劉陶執一軍人於市驗之頂髮稍長大
小且不如式卽斬之曰大小不如式必非盡去
其髮可知此三證也又卷一百三十六紹興十

年劉錡爲沿淮制置使敵衆圍順昌錡遣驍將
閻充以銳卒五百夜劫其營是夕天欲雨電光
所燭見辮髮者殲之甚衆此四證也唐書天竺
傳上爲螺髻於頂餘髮剪之使拳髻髻傳俗皆
辮髮金源本靺鞨故地與北天竺近其先世已
好佛見金史世祖紀故从天竺靺鞨舊制而小
變之然則辮髮薙髮又不始於金矣

肅府本閣帖非出淳化祖刻攷

淳化閣帖刊於宋太宗北宋時已有二王府翻
本紹興中有國子監翻本其後又有坊買翻本

洪武中有泉州知府常性翻本名世綵堂帖又有泉州馬房本萬厯中有顧汝和翻本潘大亮翻本有書坊刊王著摹本其他坊本更難指數論者皆以肅府本爲出淳化祖刊勝於潘顧二本以愚攷之未必盡然汪達淳化閣帖辨記云閣帖一百八十四版二千二百八十七行劉後村大全集一百五卷閣帖跋云閣帖真者字畫豐穠有精采如潭絳則太瘦臨江則太肥又用李廷珪墨印造不可以僞余使江右得十卷李瑋駙馬故物也後有朱印云李瑋圖籍上賜家

傳子孫有德保無窮年十卷之末皆有此印版
數行數與汪達所記合凡真帖可辨者有數条
墨色一也他本卷數在上板數在下真本卷數
版數字相連屬二也他本行數字小而瘦真本
行數字比帖中字大而濃行數皆與汪記合三
也每版行數或多或寡四也方楷敬則得一本
末有端明蔡公題曰黃子正出示因習草法末
有子正印版數行數亦與汪記合案子正名元
吉仁宗時內臣見集古錄跋尾是辨淳化祖刊
者必須版數行數與汪達記合卷數版數字相

連屬版數比帖字大每版行數多寡不同與劉後村跋合乃可定爲祖本今肅本二百四十七版比汪逵所記多六十三版不合一也卷數在上版數在下不相連屬不合二也版數字小於帖字遠甚不合三也其非從淳化祖刊重摹可知況肅本張鶴鳴跋祇云馬房光怪以前物蓋謂勝乎明拓馬房本耳非以爲祖刊也後村所見兩本有北宋人李瑋黃元吉蔡忠惠藏印題記非肅府所祖僅有元人題字者可比乃近來論閣帖者皆以肅本爲出淳化祖刊翁學士至

儀顧堂集卷二十一
三
謂肅府初拓當作淳化祖刊觀亦未取後村題
跋汪達題記一考之耳

儀顧堂集卷二終